

Dene köcökpa te Pawülü ba fü wü kpara ka Yesu agbü Kolosayi Kolosayi

Masere si-ngü

Kolosayi ta de gara mere köti agbü tö ka Asiya, te di ede Efeso to kpa fügö, baka kilometere kama 'basu (2,000). Pawülü koro ta cu agbü Kolosayi kpala nda de. Amba kpara te mala ngü ka Yesu fü wü kpara ka Kolosayi, ah de gara komoko de iri ye Epafürasi, te Pawülü mala ta nganga na, gü ba, ni le engu fa sü, angü engu ngbü emere tima ka Yesu kpekpeke, kpah baka ni, Pawülü ne. Epafürasi engu na, ah kpah de kpara ka Kolosayi. (Mü ena amaka ngü la gbü Kolosayi 1:7; 4:12.)

Pawülü ba köcökpa ne, o engu di agbü ku teka ngü ka Yesu Kurisito. (Mü ena amaka ngü la gbü Kolosayi 1:24; 4:3, 10, 18.) Fü Epafürasi akoro amala nga wü *kpara ka Yesu agbü Kolosayi ne fü Pawülü, gü ba, wüh to maguma wü eyi 'buru fü Yesu Kurisito, kpah da ele te-wü de wü bu wü, wü kpara ka Yesu. Te Pawülü je ngü la, fü ah angbü de mere tadu teka ngü ka-ewü la. (Mü ena amaka ngü la gbü Kolosayi 1:4, 8.)

Fü Epafürasi adu amala kpah gara ngü fü Pawülü, gü ba, wü gara wü siti mürü mani kpo eyi da efiti wü kpara ka Yesu agbü Kolosayi de siti riri ka-wü, gü ba, ah de riri ka Me. (Mü ena amaka ngü la gbü Kolosayi 2:8-23.) Te

Pawülü je ngü la bala, fü ah angbü de cinga teka ngü ka-ewü. Teka ngü la, fü Pawülü ayia aba köcökpa ne fü wü kpara ka Kolosayi, teka aü fingangü ka-ewü, de wüh rü kpekpeke gbü ngü ka Yesu. Wüh mere e adi eje tondö ngü ka wü mürü wu la nda-wü de. Mere kpeke ngü te engu mala fü ewü, ah gü ba, Yesu Kurisito de Mere Miri te ngbü gbü nzö nih, de wü gara ngü 'buru me-ye. Yesu küwa nih eyi gbü wü *siti ngü 'buru. Gara ngü te nih ena amere teka aküwa te-nih de tete-nih ne, ah nda ma. (Mü ena amaka ngü la gbü Kolosayi 1:15-2:3.)

Pawülü tima köcökpa ne fü wü kpara agbü Kolosayi esaka Tikiko ake Ünessimü. (Mü ena amaka ngü la gbü Kolosayi 4:7-9.) Tikiko kpah de kpara te Pawülü tima köcökpa fü wü kpara ka Efeso ta esakaka. Ünessimü nda-ye de kpara ta te Pawülü ba köcökpa fü Filemüna tekaka na ne, angü Ünessimü engu ta de labi ka Filemüna.

Ngü te Pawülü ba tima fü wü kpara ka Yesu agbü Kolosayi ne, ah kpah ge baka wü ngü, te ngbü emere te-wü de titine ne. Mere ngü gbü köcökpa ne, ah de ngü ka wazi ka Yesu te di füh wü ngü 'buru, angü engu ngbü eküwa wü kpara 'buru, de te ewü ngbü baka labi gbü ku ka *Satana ne.

Wü ngü te mü ena amaka gbü köcökpa ka wü Kolosayi ne, wüh dene.

Sapita 1 Ngü ka wazi ka Miri Yesu, te fa wü ngü 'buru

Sapita 2-4 Ngü ka ngbüngbü ka wü kpara, te ewü ra fü Yesu

Dene mandī ka Pawülū fū wü kpara ka Yesu, agbü Kolosayi

¹⁻² De-ra Pawülū, te Me fe ra *mürü tima ka Yesu Kurisito ne, a ba köcökpa ne fū yi me-a, ake engā ni nih Timoteyo. A ba köcökpa ne fū yi wü *kpara ka Yesu agbü Kolosayi, kükürü de, angü yi de zūka wü di engā ni a, te yi lala eyi eküte Yesu Kurisito. Wö nih, Me, di de yi, da eto gu ngü ka-ye fū yi de *zūka maguma ye.

Dene ngü te ma ngbü egbo nga Me di, teka ngü ka-yi

³ Gbü wü sīkpī 'buru, a ngbü eku gba fū Me, Wö ye Miri ka-nih Yesu Kurisito ne, da egbo nga iiri na, teka ngü ka-yi. ⁴ A ngbü egbo nga iiri Me bala, kükürü de, angü a je nga yi, gü ba, yi to maguma yi eyi 'buru fū Yesu Kurisito, kpah da ele te-yi de wü bu yi, wü kpara ka Yesu, de maguma yi biringbö. ⁵ Kükürü de, angü yi ngbü eyi eo jia yi teka *küküwa, de te Me reke o fū yi agbü sü ka-ye agbü kpī ne. Küküwa la, wüh mala nganga ta eyi fū yi gügü, gbü sīkpī ta te Epafürasi mala zu ngü ka Yesu fū yi tete na ne. ⁶⁻⁷ Titine ngü ka Yesu la kpo eyi da ebaya gbü nga nzö wü sü, füh kotö ne 'buru. Fū mere bi wü kpara, te ewü ngbü eje ngü ka Yesu la, akpo da efü maguma wü, ele ngü la de maguma wü biringbö. Ngü la ngbü emere te-ye kpah baka ngü te yi ngbü emere esüka yi agbü Kolosayi kpala, akpo gbü sīkpī ta te Epafürasi mala ngü ka Yesu fū yi tete, gü ba, “Me tima Yesu eyi, teka aküwa nih, teka *zūka maguma ye ne.” Epafürasi, ta te mala ngü ka Yesu fū yi ne, engu

de züka kpapa, ah kpah de kpeke kpapa, te a le engu fa sü, angü ah ngbü emere tima ka Yesu de maguma ye biringbö kpah baka a. Teka ngü la, fü a atima engu kpaka yi teka amala ngü ka Yesu fü yi. ⁸ Ah du mala nga yi fü a sene me-ye, gü ba, *Nzila Wazi Me to wazi eyi fü yi, teka fü yi angbü ele wü bu yi di.

⁹ Teka ngü la, akpo gbü sïkpï te a je ngü ka-yi la tete, fü a angbü fi bü da eyi-ta Me teka yi gbü wü sïkpï 'buru, de Me di de yi, da eto Nzila Wazi ye emaguma ye, teka fü yi adi ewu wü ngü, de te Me ngbü ele ne, adi emere mbi mbi mbi. ¹⁰ Te di bala, yi ena angbü fi bü da emere wü ngü, de te ena areke gbü jia Miri ka-nih Yesu Kurisito, da efa nganga mbi mbi mbi. Te yi ngbü emere züka ngü la bala, Miri Yesu ena angbü de mere tadu teka yi, fü yi awu ngü ka Me areke areke, anü di kpa engagira nü. ¹¹ A ngbü kpah eyi-ta Me, teka de Me to mere züka wazi ka-ye, te fa wü ngü 'buru ne, fü yi, teka fü yi adi engbü de tadu ka Me emaguma yi, erü kpekpeke, da etüka te-yi gbü wü cinga ka-yi 'buru.

¹² Nih gbo nga iri Wö nih Me de tadu, angü engu fü nih eyi züka wü di ye tete, teka fü nih amaka kpah züka ngü, de te engu reke o fü wü kpapa ka-ye agbü kpï ne. ¹³ Angü Me küwa nih eyi gbü siti wazi ka *Satana, ta te zoro nih baka biti ne. Fü Me adu aza nih, ao esa wazi Ye ye, Yesu Kurisito, te engu le fa sü ne. ¹⁴ Angü Yesu Kurisito kpi teka afuru nih gbü ku ka Satana, kpah teka fü Me aboro wü *siti ngü ka-nih.

Dene ngü ka wazi ka Miri Yesu, te fa wü ngü

'buru

¹⁵ Kpara te wu Me de jia ye nda ma, amba nih tĩ eyi awu Me eküte Yesu Kurisito, angü engu de Me, te za küte baka nih. Yesu ka-ye ta kü ladü, o Me mere wü e la de. Me o engu ba Miri gbü nzö wü e, de te engu mere ne 'buru. ¹⁶ Angü Yesu mere wü e ka-ye 'buru me-ye, gbü wazi ka Me, te di de Wö ye na. Ah mere wü e agbü kpĩ, de mene ewü füh kotö ne, de mene wü e te nih tĩ eyi awu de jia nih, be kpah te mene ewü te nih tĩ awu de. Engu mere kpah wü *malayika, de wü mere kpara ka-wü, anga wü miri ka-wü. *Satana, de *siti wü di engame, ta te ewü sü gü te Me ne, engu mere ewü kpah me-ye. Angü Me to wazi fü Yesu, de ah mere wü e la 'buru me-ye, teka de wüh di egbo nga iri Yesu teka ngü la. ¹⁷ Ta gügü te engage, o wüh mere gara e 'buru 'buru la de, Yesu Kurisito ka-ye ladü. Te di bala, ah ngbü eceka kpĩ sidi nga wü e la, da eto wazi fü ewü 'buru me-ye, de wüh di emere tima ka-wü gbü züka kaje.

¹⁸ Yesu Kurisito de Miri ka-nih. Ah kpah baka nzö nih, nih nda-nih baka küküte. Ah ngbü eküwa nih me-ye, angü ah kpah de gina kpara, te Me zükü engu gbü kpĩ. Dela si-ngü te Yesu Kurisito ngbü di mere Miri gbü nzö wü miri, de wü e 'buru ne. ¹⁹ Angü Me to wazi ye 'buru fü Yesu, de ah mere wü ngü 'buru gegege baka ni, Me. ²⁰ Kpah bala, Me mala teka wü e de füh kotö ne, de wü mene e agbü kpĩ, gü ba, de-ni, Me, ni ena areke ngü ka wü e la 'buru de *ngüte Ye ni, Yesu Kurisito. Angü Yesu kpi füh *rü gbegete teka aküwa nih, wü kpara 'buru.

²¹ Ta te engä gina, süka yi ngbü de wü Me nengete, angü yi ta ba wü vügü kaka, teka siti fingangü, de wü *siti ngü ka-yi, ta te yi ngbü emere ne. ²² Amba tītine, Me boro siti ngü ka-yi emaguma ye eyi, teka ngü ka kpi ka Yesu Kurisito. Angü wüh bī Yesu Kurisito fūh kotö ne, fū ah akpi teka afü yi ba wü di Me. Te di bala, yi tī eyi arü engagira Me ba zūka kpara *nzila, angü gara siti ngü, te wüh ena amala ngü eküte yi tekaka ne, tīne eyi ma. ²³ Te yi le angbü ba wü di Me la, ah le de yi lala fī bü eküte ngü kaka, da eo jia yi teka ngü ka Yesu Kurisito, ta te wüh mala fū yi ne. Yi mere e ace ngü la de. Angü dela ngü ka Yesu, te wü eyi bala, gbü wü nga nzö sü fūh kotö ne 'buru.

Dene ngü ka tima te Me to fere

De-ra Pawülü, Me tima ra kpah eyi teka fū ra angbü emala ngü ka Yesu fū wü kpara. ²⁴ Amba tītine ma ngbü ezü cīnga de gbü ku ne, teka ngü ka Yesu la. Te di bala, ma ngbü engbü de tadu teka cīnga la, angü dela ngü te ena ato wazi fū yi. Angü Yesu mala ta ngü, gü ba, wü kpara ka-ni ena azü cīnga bala, teka ngü ka-ni. Te di bala, ah ba e te ma ngbü ezü du cīnga ka Yesu ne, teka ato wazi fū wü kpara kaka. ²⁵ Me fe ra *mürü tima ka-ye, teka ale ta-ngü te yi, ato wazi fū yi, wü kpara ka-ye. Angü ah mala ngü fere, gü ba, ma mala ngari ni, Me, fū yi, wü *ganzi kpara, 'buru. ²⁶⁻²⁷ Ngari Me, te engu to fere la, ah de ngü ka Yesu Kurisito. Ta gügü te engä gina, Me wo ngü ka Yesu la awo fū wü kpara 'buru. Amba tītine, gbü wü sīkpī ne, Me du sere ngü ka Yesu

Kurisito la eyi fü nih, wü kpara ka-ye, mbölö. Dela mere kpeke fingangü ka Me, te fa wü ngü 'buru afa. Angü Me le agü tamu fingangü ka-ye la fü nguwa wü kpara füh kotö ne 'buru. Ngü la, ah de ngü ka Yesu Kurisito, te ngbü me-ye emaguma yi. Tekä ngü la, nih ngbü eyi 'buru eo jia nih, teka fü nih aküwa te gara, agbü sü ka Me agbü kpî.

²⁸ Dela si-ngü te a ngbü emala ngü ka Yesu Kurisito tete, fü wü kpara 'buru ne. Fü a angbü kpah da erî ewü kpekpeke, de wazi te Me to fü a ne. Angü a le de wü kpara 'buru to maguma wü fü Yesu Kurisito, fü jia ewü amba amba gbü ngü ka Me, teka fü ewü angbü ba züka wü kpara ka Me. ²⁹ Te di bala, ma ngbü eo to ra, teka amere tima la, anza, de mere wazi, te Yesu Kurisito ngbü eto fere ne.

2

¹ Wü di enga wüna, te ma wu yi de jia ra kpah de la, ngü ma, amba ma le fü yi awu, gü ba, ma ngbü eo to ra 'buru teka ngü ka-yi, da eku gba fü Me teka yi, wü *kpara ka Kolosayi. Ma ngbü kpah eku gba fü Me teka wü kpara ka Yesu de ede yi, agbü Lawüdükiya la, be kpah te mere bi wü kpara, te ewü wu ra de jia wü la de, kpah baka yi ne. ² Ma ngbü eku gba fü Me bala, de ah to wazi fü yi, teka fü yi arü kpekpeke gbü ngü ka Me, kpah da ele te-yi esüka yi de maguma yi biringbö. Ma le kpah de Me ü fingangü ka-yi, fü yi awu zu ngü ka Me 'buru areke areke, teka fü yi angbü de tadu. Angü ah de zu ngü ka Me, te Me sere fü nih gbü wü re ne. Ngü la, ah de ngü

ka Yesu Kurisito, *E-küwa-nih. ³ Angü Yesu ngbü eto wazi fü nih, da eü fingangü ka-nih duu meye, teka fü nih awu mere kpeke ngü, gbü ngü ka Me mbi mbi mbi. Angü ngü ka Me la, ah de mere züka ngü, te wo te-ye awo fü wü kpara.

⁴ Ma mala wü ngü la fü yi bala, angü wü kpara ena afiti yi, de gara türü ngü ka mani ka-wü la fiti. ⁵ Baka te ma di esüka yi kpala ma ne, ah mere e de. Amba nih ladü de nih ma tundu gbü fingangü, angü ma ngbü kpakine fi bü da efi nga yi. Ma ngbü de tadu, angü ma je nga yi eyi, gü ba, yi ngbü kpala ele te-yi de wü bu yi, de maguma yi biringbö. Yi ngbü kpah erü kpekpeke gbü ngü ka Yesu.

Dene ngü ka ngbüngbü ka wü kpara, te ewü ra fü Yesu

⁶⁻⁷ Wü di enga wüna, titine yi ra eyi fü Miri Yesu. Te di bala, ah le de yi di fi bü emere wü ngü 'buru, de te engu ngbü ele ne. Yi lala eküte Miri Yesu, baka rü te to si ye, lala gbü tö, de yi nü de ngü kaka kpa engagira nü. Yi rü kpekpeke gbü ngü ka Miri Yesu, de te wüh ri yi di la, de yi di eo to yi, da egbo nga iri Me, gbü wü sikpi 'buru.

⁸ Yi ceka te-yi mbi, angü wü gara kpara ena afiti yi de töndö riri ka-wü. Angü wüh gü ba, riri ka-ani la, ah de riri ka Me, amba ah de ngü ka Me nda de! Ah ka-ye de mere wu! Ah ka-ye de siti riri ka gele ka wü me ka wü kundu wü. Dela riri ka Yesu Kurisito nda de. ⁹ Ah le de yi lala te zu ngü ka Yesu, angü Yesu Kurisito de Me gegege baka Wö ye. Fü ewü abi engu ba kpara fuh kotö ne, teka asere ngü ka Me la

mbölö fü nih. ¹⁰ Engu kpah de Mere Miri, gbü nzö wü e 'buru, wü kpara, de wü *malayika ka Me, be kpah te wü *siti wü di enga me, de wü muruyi 'buru. Angü Me to wazi la me-ye fefe. Dela si-ngü te Me to kpah wazi la di fü yi, angü yi ngbü eyi elala eküte Yesu Kurisito.

¹¹ Teka ngü ka Yesu, te yi lala eyi eküküte na ne, Me ba tere ka-ye eyi eküte yi, teka asere fü wü kpara, gü ba, yi de wü kpara ka-ni, ka Me fanü fanü. Nda wü di enga *Yisaraye, wüh ngbü eti esa *basa, teka asere ngü la fü wü kpara, gü ba, ani de wü kpara ka Me me-ani. Amba, nda-nih tere te Me ba eküte nih ne, ah ka-ye kpikpi ye. Ah de ngü te wü kpara mere de kpa wü ne nda de. Angü Yesu Kurisito za diri fingangü ta emagama nih ne eyi asidi, teka fü nih angbü *nzila bakaka. ¹² Kpah bala, gbü sikipi ta te yi za *babatiza tete, ah baka ta te yi kpi eyi tundu de wü Yesu, fü ewü ati yi gbü mbükü kpah tundu de ewü. Fü Me adu azükü yi gbü kpi la, kpah tundu de wü Yesu, teka te yi to maguma yi eyi fefe. Kpah bala, angü yi le eyi, gü ba, Me zükü Yesu Kurisito eyi gbü kpi, de mere wazi ka-ye.

¹³ Angü te enga gina, yi ngbü ta baka wü kövö, teka wü *siti ngü ka-yi, ta te yi ngbü emere ne, angü yi wu ngü ka Me la de. Kpah bala, yi le ngü ka Me ta kpah de. Amba titine, Me küwa yi gbü siti ngü la eyi, teka ngü ka Yesu Kurisito. Angü ah boro wü siti ngü ka-nih la eyi guvu ye 'buru asidi. ¹⁴ Angü Me kolo ta ngü ka-nih eyi, fü ah aba ngü la gbü köcökpa, gü ba, nih ena akpi akpi fi mere badi, angü nih mere *Riri ka-ni, Me, nda-nih de. Amba titine teka ngü ka Yesu, te

kpi füh *rü gbegete, teka aküwa nih ne, Me du sörö ngü, ta te engu ba teka ngü ka-nih ne, eyi asidi. ¹⁵ Angü, gbü sikipi te Yesu kpi tete füh rü gbegete, Me nza wazi *siti wü di engu me eyi, de wü miri ka-wü, de wü muruyi 'buru. Füh ah ato lümü te ewü gbü jia wü kpara 'buru, ayia ao ewü tñe wü labi, esa lö Yesu.

¹⁶ Te di bala, wü di engu wüna, wü gara kpara le ao riri ka gele ka-wü kpekpeke ba riri ka Me, neh teka ne? Wüh gü ba, yi mere e azü mene e dene de, anga yi nzö mene e dene de. Anga teka gele ka to fu-fe, anga *sikipi ka Me, anga gara gele bane, yi di emere ngü bane, anga yi mere ngü bane de. Amba ma ngbü emala füh yi, gü ba, yi mere e aje ngü ka-ewü la nda-yi de. ¹⁷ Angü riri ka gele ka wü kundu nih la, ah bü baka kuru e, te Me to ta teka asere nga ngü ka *küküwa, te ni, Me, ena aküwa nih di ne. Amba zu küküwa la, ah ka-ye duu de Yesu Kurisito kpikpi ye. Te di bala, ah le de nih ce ngü ka gele la, nih du, nih lala gbü nga Yesu. ¹⁸ Anga te gara kpara koro, fiti yi, gü ba, ah le de yi di ecu ngü wü di engu me, anga wü malayika, da eku gba füh ewü la, yi mere e aje ngü ka-ewü la nda-yi de, angü yi ena adürü te kaje ka Me. Te mü de *kpara ka Yesu la, mü di ecu 'duwa ngü Yesu kpikpi ye. Wü kpara, te ewü emala siti riri de bala, le ao te-wü memere, gü ba, "Wüh sere ngü la füh ani gbü roto." Amba ngü ka-ewü la, ah de ngü ka Me nda de, ah ka-ye de töndö ngü kükürü. ¹⁹ Wü mürü wu la lala eküte zu ngü ka Miri Yesu ne nda-wü de. Te di bala, nih lala nda-nih eküte Miri Yesu, angü engu baka nzö nih. Nih, wü kpara kaka, tñe baka

küküte. Angü Miri Yesu ngbü eto wazi fü nih me-ye, teka fü nih adi ele te-nih de wü bu nih di. Fü nih angbü ba nguwa kpara biringbö, aga, akoro kpekpeke gbü ngü ka Me.

²⁰ Wü di enga wüna, ah mere neh baye? Yi wu, gü ba, te yi lala eyi gbü nga Yesu, yi kpi eyi tundu de ewü ne, yi wu bala nda-yi de? Te di bala, wü di enga me ti angbü de wazi gbü nzö yi nda-wü de, angü Yesu za yi eyi esa wazi ka-ewü la asidi. Te di bala, anga yi le adu angbü kpah emere wü riri ka wü gele, neh teka ne? ²¹⁻²² Yi mere e aje riri ka-ewü la nda-yi de, angü wü mürü wu la ena ato riri ka gele ka-wü la fü yi, gü ba, gara e bane, yi zü de, yi to kpa yi tete kpah de, angü ngü la ena asiti yi gbü jia Me. Amba dela ka-ye töndö riri ka wü kpara füh kotö ne, ah de riri ka Me nda de. Ah le de nih wu awu, gü ba, ngü ka wü e füh kotö ne ena anza ka-wü 'buru anza. Te di bala, wü e la ena asiti nih gbü jia Me, neh baye? ²³ Fanü fanü, wü gara kpara ngbü efi, gü ba, wü riri ka gele la de zu ngü, te ngbü eto wazi fü wü kpara, teka fü ewü areke di gbü jia Me. Wü kpara, te ewü le wü riri de bala, ngbü embü te-wü de mere bi wü riri la, kpah da *e'bi te-wü, da enda'ba te-wü fü wü di enga me. Amba ngü gbü wü e la 'buru nda ma. Wü riri ka gele la le ta-ngü te kpara, teka fü ah ace siti ngü ka-ye ne, nda de.

3

Dene zu riri ka Me, te ah le de nih di emere

1-2 Wü di engä wüna, ah baka te nih kpi ta eyi tundu de wü Yesu. Fü Me adu azükü nih gbü kpi la kpah tundu de ewü, angü nih lala eyi eküküte. Te di bala, ah le de yi o maguma yi, de wü fingangü ka-yi 'buru, teka ngü ka Me agbü kpî. Yi mere e afi nga wü e ka füh kotö ne de. Angü Yesu, de te yi lala eküküte ne, ah ngbü eyi füh kpökpö ka mere miri, gbü kokpa ka Me agbü kpî. ³ Kpah bala, yi wu kpo, gü ba, nih kpi ta eyi de wü Yesu. Te di bala, nih ti afi nga siti ngü ka kotö ne nda-nih tine de, angü Me küwa nih eyi, teka te nih lala eyi eküte Yesu Kurisito ne. Te di bala, wü kpara füh kotö ne ti awu ngü ka *küküwa, te nih maka la, nda-wü de, angü küküwa la wo te-ye awo, guvu Yesu Kurisito. ⁴ Kpah bala, gbü sîkpî te Yesu, *E-küwa-nih, ena adu akoro, teka asere te-ye tete fü wü kpara füh kotö ne 'buru, baka Mere Miri, engu ena asere nih fü ewü, baka züka wü kpara ka-ye *nzila.

⁵ Te di bala, ah le de yi ce siti gümü wü ngü ka füh kotö ne asidi. Yi ceka wü ngü la gbü jia yi baka e te yi kpi eyi akpi. Yi ce ngü ka waza, ngü ka yala, de wü siti fingangü ka lümü 'buru asidi. Mü za würüse, anga komoko ngbee biringbö, de yi ngbü duu ake di. Yi ce ngü ka gümü e kpah asidi, angü te mü ngbü ekpi gümü e la, ah ba e te mü ngbü eo wü e la baka me ka-mü.

⁶ Dela si-ngü te maguma Me ena anzu, fü ah ato kuru te wü kpara, te ewü ngbü emere wü *siti ngü de bala ne. ⁷ Angü ta gügü, o yi le ngü ka Yesu la de ne, yi ngbü ta emere wü *siti ngü de bala gbü wü sîkpî 'buru, kpah baka wü bu yi.

⁸ Amba titine, yi mere e adu arî gbü wü ngü la

tüne de. Yi mere e agü gü de wü kpara de. Yi mere e angbü de siti maguma kpaka wü kpara kpah de. Yi ce ngü ka kanga, ambala'ba, de wü soko 'buru asidi. ⁹ Yi mere e angbü esutu wu esüka yi de. Angü, gbü sikipi ta te yi to maguma yi tete fü Yesu ne, yi ce wü diri siti fingangü, ta te yi ngbü emere ne, eyi 'buru, ¹⁰ Titine ne, Me fü yi eyi ba to kpara gegege baka ye, teka fü yi adi ewu ngü ka-ni, Me, ereke areke, fü yi angbü emere wü ngü 'buru baka te ni, Me ngbü ele. ¹¹ Te di bala, nih, wü *kpara ka Yesu, nih ngbü tüne eyi baka nguwa kpara biringbö. Te mü de engä *Yisarayele, angä *ganzi kpara, ah mere e de. Te mü ti eyi esa *basa, angä mü ti nda-mü kpah de la, ah mere e kpah de. Te mü wu ngü fa sü, angä mü wu ngü 'buru 'buru de la, ah ba ngü kpah de. Te mü de mürü cinga, angä te mü di de kpeke kpara la, ngü ka-yi gbü jia Me, ka-ye 'buru biringbö. Angü mere ngü, ah ka-ye duu ngü ka Yesu Kurisito kpikpi ye, angü nih lala eyi eküküte, fü engu angbü emaguma nih.

¹² Wü di engä wüna, Me fe yi eyi, o züka wü kpara ka-ye tete *nzila, angü ah le yi fa sü. Te di bala, ah le de yi di ewu cinga wü bu yi, da emere züka ngü fü ewü bu, da ele ta-ngü te ewü, gbü wü sikipi 'buru. Yi mere e angbü e'du ngü yi de. Yi di emere wü ngü 'buru ferrre. Maguma yi mere e adi enzu kere kere de. ¹³ Yi di engbü de gu maguma esüka yi. Te gara kpara mere yi esiti la, yi ce ngü la fefe. Ah le de yi di eboro siti ngü ka wü bu yi, kpah baka te Miri ka-nih Yesu ngbü eboro siti ngü ka-nih ne. ¹⁴ Mere ngü te yi ena angbü emere esüka yi, ah dene. Yi di

ele te-yi esüka yi de maguma yi 'buru, angü te yi mere bala la, ngü ka-yi ena angbü kpah 'buru biringbö.

¹⁵ Ah le de Yesu Kurisito to wazi fü yi, teka fü yi angbü de gu maguma esüka yi. Angü dela si-ngü te Me i yi tete, teka fü yi angbü tundu ba kpara biringbö. Ah le kpah de yi di egbo nga Me gbü wü sikipi 'buru. ¹⁶ Ah le de ngü ka Yesu Kurisito ngbü fi emaguma yi, gbü wü sikipi 'buru, teka fü yi awu ngü kaka areke areke. Te di bala, ah le kpah de yi di eri wü bu yi de ngari Yesu, da eto wazi fü ewü. Yi di kpah ebi wü ci ka Me esüka yi, da egbo nga iri Me di de mere tadu.

¹⁷ Wü di enga wüna, dela kpeke ngü te ma mala fü yi. Ah le de wü ngü, te yi ngbü emere, anga emala esüka yi ne, de yi di emere wü ngü la 'buru de iri Miri Yesu. Yi di kpah egbo nga iri Wö nih Me, teka ngü ka Yesu.

Dene ngü ka ngbüngbü ka wü kpara ka Yesu agba wü

¹⁸ Dene ngü te ma le amala fü yi, wü würi. Ah le fü yi angbü eje ri wü watı yi. Angü te yi ngbü emere bala la, ngü la ena areke gbü jia Miri Yesu afa sü.

¹⁹ Nda-yi wü komoko, ma emala fü yi, gü ba, ah le fü yi angbü ele wü wara yi ale. Yi mere e adi emere ewü esiti de.

²⁰ Nda-yi wü jaji, ngü te ma le amala fü yi, ah kpah dene. Ah le de yi di eje riri ka wü wö yi de wü ni yi gbü wü ngü 'buru, angü ngü de bala reke gbü jia Me fa sü.

²¹ Nda-yi, wü wö ye wü jaji, de wü ni ewü, yi mere e adi erī wü jaji ka-yi de siti maguma de, angü ngü la ena asiti fingangü ka-ewü.

²²⁻²⁴ Teka ngü ka-yi, wü labī, ma emala fü yi, gü ba, ah le de yi di eje riri ka wü mere kpara ka-yi gbü wü ngü 'buru. Yi mere e adi emere wü züka ngü bü teka jia wü mere kpara ka-yi, teka de ngü ka-yi reke, ne de. Yi mere e adi emere tima, te wüh to fü yi, de maguma 'basu 'basu de. Ah le de yi di emere tima ka-yi de maguma yi 'buru biringbö, baka te yi ngbü emere tima ka Miri kanih Yesu Kurisito. Ah le de yi di emere tima ka-yi kpekpeke, angü yi wu kpo, gü ba, te gara, yi ena amaka züka wü ngü, de te Miri Yesu reke, o agbü kpī fü wü kpara ka-ye ne. Angü zu mere kpara ka-yi, de te yi ngbü emere tima kaka-na ne, ah ka-ye de Yesu Kurisito. ²⁵ Amba mene wü kpara, de te ewü ngbü emere siti ngü ne, ah le de wüh wu awu, gü ba, Me ena ato kuru te ani te gara. Angü Me ena akolo ngü ka wü kpara 'buru, ah ti afüwa kpara biringbö nda de.

4

¹ Amba de-yi, wü mere kpara, ma emala fü yi, gü ba, ah le de yi di engbü de züka maguma kpaka wü labī ka-yi, da emere ewü ereke areke. Yi di ele ta-ngü te ewü kpah ereke areke, angü yi wu eyi, gü ba, mere kpara ka-yi kpah ladü agbü kpī, te di de Yesu Kurisito. Angü engu wu ngü te yi ngbü emere ne 'buru kpo.

Dene gara ngü te ma le arī yi di

² Wü di engä wüna, yi di eku gba fü Me kpekpeke, da egbo nga iiri. Yi mere e ace da eku gba fü Me de. ³ Ah le kpah de yi di eku gba fü Me teka a. Yi di kpah eku gba fü Me, teka de engu ü kaje, fü a adi emala ngü ka Yesu Kurisito fü wü kpara, angü wüh wu ngü ka Yesu gügü ndawü de. Te di bala, dela tima te Me fe ra, adi emere. Fü ewü ayia agü ra gbü ku ne, teka ngü la. ⁴ Te di bala, yi di eku gba fü Me teka ra, de ah to wazi fere, teka de ma di esere ngü ka Yesu la di mbölö mbölö fü wü kpara, de wüh di eje sisi na mbi mbi mbi, baka e te reke gbü jia Me.

⁵ Ah le de yi di eceka te yi 'be, teka ngbüngbü ka-yi, esüka wü kpara te ewü le ngü ka Yesu de ne. De yi giri züka kaje, teka amala ngü ka Yesu tete fü ewü. ⁶ Te yi ngbü emala ngü ka Yesu, anga ero mö de wü kpara, te ewü le ngü ka Yesu de ne la, yi di emala ngü fü ewü ferrre, de züka türü ngü mündü gömö yi baka ngütü, te mi ami gbü wuru la. Angü te wü kpara la yi-ta yi teka ngü ka Yesu la, yi ena awu züka kaje, te yi ena angbü elügü ngü la fü ewü tete.

Dene adu ngü ka-ra, Pawülü

⁷⁻⁸ Ma tima köcökpa ne fü yi esaka Tikiko, te di de züka engä wüna, te ma le engu fa sü, gbü ngü ka Yesu Kurisito. Engu de kpeke kpara te ngbü ele ta-ngü te-ra, angü a ngbü emere tima ka Yesu Kurisito la tundu de ewü. Engu ena amala nga ra fü yi tine cu me-ye mbi mbi mbi. Dela singü te ma tima engu de köcökpa ne tete kpaka yi, teka de ah to kpah wazi fü yi gbü ngü ka Me. ⁹ Wü Tikiko ena akoro kpaka yi kpala ake

Ünesimü,* züka enga wüna, te di kpah de kpeke kpara gbü tima ka Yesu. Engu kpah de kpara ka-yi, ka Kolosayi, te yia ta kpala, koro kpakine. Wüh ena amala nga wü ngü, de te ngbü emere a de kpakine ne, 'buru fü yi tîne me-wü.

¹⁰ Arisitarekü, te a di ake di agbü ku de kpakine ne, to kpah mandî fü yi, ake Marako, te di de mürü ye Baranaba ne. Te Marako koro eyi kpaka yi kpala la, yi le ta-ngü tete, angü ma mala ta nganga na eyi fü yi te enga gina.

¹¹ Yusito† to kpah mandî fü yi. Wü kpara de bata ne, Arisitarekü, Marako, Yusito, wüh de wü di enga *Yisarayeale, te ewü to maguma wü eyi fü Yesu. Wüh ngbü ele ta-ngü te ra gbü tima ka Me efa sü. Amba gara wü di enga Yisarayeale te a ngbü emere tima de ewü kpakine, nda ma, 'duwa bü mene ewü de bata la.

¹² Enga ni yi, Epafürasî ne, to kpah mandî fü yi. Engu de züka kpara gbü tima ka Yesu Kurisito. Ah ngbü fi bü eo to ye kpekpeke, da eyi-ta Me fü yi, teka de Me to wazi fü yi, arü di kpekpeke gbü ngü ka-ye, kpah da emere wü ngü 'buru baka te Me ngbü ele. ¹³ Ma ngbü emala fü yi dene zu ngü, gü ba, Epafürasî engu ngbü efi nga yi, da eku gba fü Me teka yi kpekpeke, kpah teka wü *kpara ka Yesu agbü Lawüdükiya, de mene ewü agbü Yerapoli ne.

¹⁴ Luka, züka mürü kuwa, te a le engu fa sü ne, to kpah mandî fü yi mini, ake Dema.

* **4:9** 4:9 Ünesimü de kpara te Pawülü ba köcökpa fü Filemüna tekaka, angü engu ta de labî ka Filemüna, te di de kpara ka Kolosayi. † **4:11** 4:11 Gara irî Yusito de Yosua.

¹⁵ Yi to mandī ka-a fū wū kpara ka Yesu agbū Lawüdükiya kpala 'buru. Yi to kpah mandī fū Nifa, de wū kpara ka Yesu, te ewü ngbū ebiti te-wū agba ka la 'buru.

¹⁶ Te yi tanga köcökpa ne esüka yi eyi la, de yi tima kpah fū wū kpara ka Yesu agbū Lawüdükiya la, de wüh tanga. Ah le kpah de yi tanga mene köcökpa, te ma tima fū wū kpara ka Lawüdükiya ne.

¹⁷ Yi mala fū Arīkipo, gü ba, ah le fū engu amere tima, de te Miri Yesu to fefe na ne, de züka maguma ye, akoro di te adudu na.

¹⁸ De-ra Pawülü, ma to mandī fū yi fa sü. Ma ba ngü ne fū yi cu me-ra de kpa ra. Yi di efi nga ra agbū ku kpakine mini, kpah da eku gba fū Me teka ra kpekpeke. Me di de yi, da eto wazi fū yi de *züka maguma ye. Ah di bala.

To Ngü Mürü ka Me bete Gina Ngü (S Sudan)
Mündü: To Ngü Mürü ka Me bete Gina Ngü (S
Sudan) New Testament+

copyright © 2005 Wycliffe Bible Translators, Inc.

Language: (Mündü)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

9787304f-bc80-5421-9b63-c767eb819b6f